

27 juni 2016

Share: [f](#) [t](#) [g+](#) [in](#)

Vijest

Demant: Međunarodni aerodrom Sarajevo

| BIRN BiH | Sarajevo

Ovim putem objavljujemo prigovor Međunarodnog aerodroma Sarajevo na sadržaj članka koji je objavljen na našoj stranici pod nazivom "Armin Kajmaković izgledan kandidat za direktora Aerodroma".



Članak je objavljen 21.06. 2016. godine. Ovim putem se javno izvinjavamo Arminu Kajmakoviću, kao i ostalim osobama koje su pomenute u tekstu u ime novinara Nedima Hasića, kao i uredništva Balkanske istraživačke mreže Bosne i Hercegovine (BIRN BiH).

Kompletan demant možete pročitati [ovdje](#):

Vrsta dok.	Izdavač	RB
DOP	10 00	457

U nastavku sadržaj članka:

Armin Kajmaković izgledan kandidat za direktora Aerodroma

Armin Kajmaković, muž tužiteljice Tužiteljstva BiH Dijane Kajmaković, glavni je kandidat za generalnog direktora "Aerodroma Sarajevo".

Kajmaković, koji se već šest mjeseci nalazi na mjestu vršitelja te dužnosti, jedan je od trojice kandidata koji su se javili na konkurs. Zahvaljujući podršci Saveza za bolju budućnost (SBB) BiH, stranke koja ga je i postavila na mjesto vršitelja dužnosti, Kajmaković ima velike šanse da mu Vlada Federacije u narednim danima ispred imena izbriše prefiks v.d.

Polugodišnji period na koji je Kajmaković imenovan kao vršilac dužnosti istekao je i Vlada će u narednih desetak dana odlučiti o imenovanju.

Kajmaković se nedavno susreo s problemom otpuštanja dotadašnjih radnika "Aerodroma" i istovremenog zapošljavanja bez konkursa bivših uposlenika kompanije "BH Airlines". Poslušao je preporuku iz Vlade Federacije BiH i zaposlio 26 bivših uposlenika "BH Airlinesa" na Aerodromu, na mjestima na kojima su do tada radili uposlenici sa ugovorom o djelu, sa kojima su ugovori prekinuti.

Otpušteni radnici su protiv njega podnijeli krivičnu prijavu i slučaj je pred sarajevskim Kantonalnim tužilaštvom.

Armin Kajmaković je godinama bio direktor Cargo centra Aerodroma Sarajevo. Na toj dužnosti bio je i 5. decembra 2007. godine, kada je centar opljačkan i iz njega odneseno 2,5 miliona maraka, novca "ABS banke". Prema navodima iz optužnice Tužilaštva BiH, organizator cijele operacije je bio Zijad Turković. Istragu je vodio tužilac Oleg Čavka, a pomagala mu je i tužiteljica Kajmaković.

Osim Kajmakovića, komisija za izbor kandidata za generalnog direktora predložila je Vladi Federacije još dva imena. Jedno od njih je i Bakir Karahasanović iz Stranke demokratske akcije (SDA), koji je na dužnosti direktora "Aerodroma Sarajevo" bio 17 godina, sve do dolaska Socijaldemokratske partije (SDP) BiH na vlast. Na mjesto direktora imenovan je Ivan Veličan, koji je smijenjen po dolasku na vlast sadašnje koalicije SDA-SBB.

U Kantonalnom tužilaštvu u Sarajevu protiv Veličana postojala je istraga zbog osnova sumnje da je nanio štetu Aerodromu u iznosu od 1,7 miliona maraka.

Treći kandidat je Edhem Tači, jedan od direktora BHANSA-e i dugogodišnji međunarodni ekspert za sigurnost letenja, jedini koji nema podršku niti jedne stranke.

"Aerodrom Sarajevo" veoma je bitan za Vladu Federacije jer joj se godišnje od dobiti ovog poduzeća, na račun uplati oko osam miliona maraka. Na Aerodromu je oko 450 zaposlenih, koji godišnje opslužuju oko 700.000 putnika.

DEMANTIJ J.P. MEĐUNARODNOG AERODROMA SARAJEVO D.O.O. SARAJEVO

J.P. Međunarodni aerodrom „Sarajevo“ d.o.o. Sarajevo ovim putem demantuje informacije objavljene na internet portalu justice-report.com, na dan 21.06.2016. godine pod naslovom „**Armin Kajmaković izgledan kandidat za direktora Aerodroma**“.

Već u podnaslovu teksta se navodi da je Armin Kajmaković, muž tužiteljice Tužiteljstva BiH Diane Kajmaković, što je potpuno irelevantno za tekst, te predstavlja direktno uplitanje u privatni život g. Kajmakovića.

U tekstu se navodi slijedeće: „Kajmaković se nedavno susreo s problemom otpuštanja dotadašnjih radnika „Aerodroma“ i istovremenog zapošljavanja bez konkursa bivših uposlenika kompanije „BH Airlines“. Poslušao je preporuku iz Vlade Federacije BiH i zaposlio 26 bivših uposlenika „BH Airlinesa“ na „Aerodromu“, na mjestima na kojima su do tada radili uposlenici sa ugovorom o djelu, sa kojima su ugovori prekinuti.“

Vrsta dok.	Izdavač	RB
DOP	10 00	457

U cilju pune i istinite informisanosti javnosti, želimo istaći sljedeće:

Prije svega Aerodrom nije izvršio nikakvo otpuštanje radnika, a pogotovo uposlenika sa ugovorom o djelu. Radilo se o radnicima koji su imali zaključene ugovore o radu na određeno vrijeme, pa je istekom perioda na koji su bili zaključeni ti ugovori, određenom broju tih radnika prestao radni odnos (J.P. Međunarodni aerodrom „Sarajevo“ d.o.o Sarajevo nikada nije imao, niti ima uposlenika sa ugovorom o djelu – jer ugovorom o djelu ne postaje se radnik/uposlenik). Ova okolnost (prestanak radnog odnosa određenom broju radnika), nema apsolutno nikakve veze sa prijemom u radni odnos 26 bivših uposlenika „BH Airlinesa“ d.o.o niti je zbog prijema ovih radnika otpušten nijedan radnik Aerodroma. Radnici „BH Airlinesa“ nisu primljeni na „mjestima na kojima su do tada radili uposlenici sa ugovorom o djelu, sa kojima su ugovori prekinuti“, jer oni nisu primljeni isključivo na radna mjesta na kojima su do tada bili bivši radnici, već su popunili dio tih radnih mjesta, ali su raspoređeni i na druga upražnjena radna mjesta u skladu sa sistematizacijom radnih mjesta i svojim kvalifikacijama. Na kraju, novi radnici iz „BH Airlinesa“ nisu primljeni na „preporuku iz Vlade Federacije BiH“, već po posebnom aktu Vlade FBiH, koja obnaša upravljačka prava na Aerodromu Sarajevo kao predstavnik vlasnika Aerodroma Sarajevo.

U nastavku teksta se navodi: "Otpušteni radnici su protiv njega podnijeli krivičnu prijavu i slučaj je pred sarajevskim Kantonalnim tužilaštvom." U vezi sa ovim navodom želimo istaći da g. Kajmaković nema saznanja o vođenju bilo kakvog postupka pred Kantonalnim tužilaštvom, niti o podnošenju krivične prijave, niti su nadležni organi izdali bilo kakvu obavijest ili informaciju o tome.

Nadalje, konstatacija: „Amin Kajmaković je godinama bio direktor Cargo centra Aerodroma Sarajevo. Na toj dužnosti bio je i 5. Decembra 2007, kada je centar opljačkan i iz njega odneseno, 2,5 miliona maraka....“, je potpuno netačna. Naime, funkcija direktora Cargo centra u pomenutom periodu nije ni postojala u Sistematizaciji radnih mjesta J.P Međunarodni aerodrom „Sarajevo“, d.o.o. Sarajevo, niti je g. Kajmaković u vrijeme počinjenja pljačke obavljao bilo kakvu funkciju vezano za Cargo centar Aerodroma.

Sporan je i sljedeći navod „ Na mjesto direktora imenovan je Ivan Veličan, koji je smijenjen po dolasku na vlast sadašnje koalicije SDA-SBB.“ Naime, g. Veličanu je istekao četverogodišnji mandat i nije smijenjen sa funkcije direktora, kako stoji u tekstu.

Kako je u spornom članku objavljeno niz netačnih i neutemeljenih informacija, ovim putem zahtjevamo da objavite ovaj demantij, te da autor članka g. Nedim Hasić, kao i odgovorni urednik upute javno izvinjenje J.P. Međunarodni aerodrom „Sarajevo“ d.o.o. Sarajevo.

Od Vijeća za štampu kao samoregulacijskog tijela za štampane i online medije u BiH očekujemo da zaštiti javnost od neprofesionalnog i manipulatorskog novinarskog izvještavanja, te da u ovom slučaju posreduje između nas i redakcije portala justice-report.com (BIRN BiH) u cilju što profesionalnijeg rješenja ove situacije.

S poštovanjem,


 Direktor Sektora - Menadžer kvaliteta

 Nermin Zijadić